

A. Kunum Fian em Abiil so Kawin so Talfut Kelewse Sang te.

**1** <sup>1</sup>Talfut kese, Kunum Fian abiil so kawin so mesesem so kilkesekale. <sup>2</sup>Kate, kawin so abiil so mililiw so banggubi biliwi, Kunum Fian em kitil inim atew ete kuw ok mun fian tikin dim boktak tiw kalote alenalekale.

<sup>3</sup>Beli, Kunum Fian e bokolomele: “Felet mak angoka!”, ange eli, felet angsekale. <sup>4</sup>Felet angomi, e atem ete, felet be ken kesekale. Kele eli, mililiw akal ameni, felet akal amen kada kada kelewsekale.

<sup>5</sup>Kelewe eli, felet be em wiin e bokolomele: “Be taw!”, angsekale. Angeko, mililiw be em wiin e bokolomele: “Be kutiliw!”, angsekale. Angeko, kutiliw teleko, uneko, taw kikis mak matem teleko, emisik ding banimsekale.

<sup>6</sup>Kame, Kunum Fian e weng mak bokolomele: “Ok katiw da, kalak da, dolon kelew kelew keliw!”, angsekale. <sup>7</sup>Ange eli, fein kesekale. Beli, Kunum Fian ete dolon kuw, wati emdiw, kilele keleko, ok katiw da, kalak da kelewsekale. <sup>8</sup>Dolon kuw be kelewsomelei, em wiin e bokolomele: “Dolon be abiil!”, angsekale. Angeko, kutiliw teleko, uneko, taw kikis mak matem teleko, emteben ding banimsekale.

<sup>9</sup>Kame, Kunum Fian e bokolomele: “Ok abiil afak kel be mutuk makmak kuw kelomele, kano, aneng kale tiow dim kelok.”, angsekale. Angesomelei, fein kelewsekale. <sup>10</sup>Keko eli, e aneng tiow em wiin e bokolomele: “Be kawin!”, angsekale. Angeko, ok mutuk makmak kele be em wiin e bokolomele: “Be ok mun kumun alelbin fian sel!”, angsekale. Angeko eli, atemete, ken kesekale. <sup>11-12</sup>Ken kesomelei, Kunum Fian e bokolomele: “Kame, itel so kanemin kanemin ais dem so mesesem mesesem eisneng kawin dim talfut keloka!”, angsekale. Ange eli, fein kelom: Ais mesesem mesesem eisneng talfut kesekale. Keko eli, Kunum Fian e kelewsomelei, mesesem mesesem eisneng atemete, ken kesekale. <sup>13</sup>Ken kesom eli, kutiliw teleko, uneko, taw kikis mak matem teleko, yemamas ding kel banimsekale.

<sup>14</sup>Kame, Kunum Fian e bokolomele: “Abiil dim kel alikum ailbin fitewoka! Taw so kutiliw so bitaka. Be em mongom e, akalkafo

akalkafo teing bakamin fitew kelokoliw! <sup>15</sup> Beli, ailbin angom bi abiil kel tebeko, kawin dim elo ailbin kelewbokoliw.”, angsekale. Ange eli, fein kesekale. <sup>16</sup> Kesomelei, Kunum Fian e ailbin fian alew dukusekale. Fian mak e, ataan te. Taw ding kuw ailbin be. Kayow e fong ailbin kutiliw em angom, fial iso dukusekale. <sup>17-18</sup> Dukusom eli, abiil em ailbin angom kawin akal felet kelebin angom dukusekale. Dukuko, ataan so kayow so ikal amen keyemsekale. I taw so kutiliw so kawin dim em felet ailbin te. Keyemsomelei, Kunum Fian e atemete, ken kesiliwkale. <sup>19</sup> Ken keyemeko, kutiliw teleko, uneko, taw kikis mak matem teleko, ketket teben em ding kel banimsekale.

<sup>20</sup> Kame, Kunum Fian e bokolomele: “Ok mun kumun alelbin fian sel dim mesesem mesesem finik so bin talfut keliw. Kelomi, awon so mesesem mesesem bel so i fiteweko, kawin abiil dim bile yamkakamina.”, angsekale. <sup>21</sup> Ange eli, Kunum Fian e ok mun kumun alelbin fian sel em samal so fian fian sel inkal so bi so, ok mesesem mesesem finik so bi so, awon so mesesem mesesem bel so bi so eisneng eisneng ilo kilkeyemsekale. Kilkeyemsomelei, atemete, ken kesiliwkale. <sup>22</sup> Ken keyemsomelei, Kunum Fian e ilo bamki duyemsomelei, bokoyemomele: “Aul men banban dukuko, angin fian sel kelom, ok mun kumun alelbin sel dim gekokoliw! Awon e, bel so eisneng bi kawin ka banban kelokoliw!”, yangsekale. <sup>23</sup> Yangeko, kutiliw teleko, uneko, taw kikis mak matem teleko, ketket em ding kel banimsekale.

<sup>24</sup> Kame, Kunum Fian e bokolomele: “Kawin be samal mesesem mesesem finik so talfut kelina! Am samal o, mesesem mesesem finik so yan banim mesesem o, kut samal o, alik alik talfut kelina!”, angsekale. Angeko, fein keyemsekale. <sup>25</sup> Keyemeko, Kunum Fian e kut samal alik o, am samal alik o, mesesem mesesem finik so yan banim mesesem alik o, keyemsekale. Keyemsomelei, atemete, ken kesiliwkale. <sup>26</sup> Keliwi, Kunum Fian e iti weng mak bokolomele: “Kunum so waneng so mak nukalem atew, nukalem takak emdiw kemuma o! Kunum so waneng so bi i ok mun be mesesem bi so, awon bi so, samal bi so, kawin be bi so, mesesem finik so yan banim so bi so, ilo yetewbokoliw kae.”, angsekale. <sup>27</sup> Angsomelei, Kunum Fian e kunum

mak dukusomelei, waneng mak dukusomelei, akalem atew, akalem takak emdiw keyemsekale. <sup>28</sup> Keyemeko, Kunum Fian e ilo bamki duyemsomelei, bokoyemomele: “Aul banban duku kelom, kawin baka gekokoliw! Ok mun kumun alelebin sel em mesesem bi so, abiil afak em awon bi so, kawin em samal bi so, yukal im kak kunum waneng biliwte, ilo yetebokoliw te!”, yangsekale. <sup>29</sup> Yangeko, Kunum Fian e weng makso bokoyemomele: “Yukalem wanin e kawin em itel o, ais dem o, mesesem mesesem be duyemi be wanbomeliw boliwka o. <sup>30</sup> Kawin dim be em samal so, abiil dim em awon samal so, mesesem mesesem finik so bi so, i itel wanbomeliw boliwka o.”, yangsekale. <sup>31</sup> Yangei, fein keyemei, Kunum Fian e mesesem keyemsomelei, atemete, ken kuw kele eli, seyo angesomelei, kalfongsekale. Keko, kutiliw teleko, uneko, taw kikis mak matem teleko, gung em ding kel banimsekale.

**2** <sup>1-2</sup> Beli, Kunum Fian e gung kel ding aulbabi, ki ke kolewse kasike, e abiil so, kawin so, mesesem mesesem fok bi ki koleweko, keyemeko eli, ben ding kel be, alubamin makso banim keko, finengdasekale. <sup>3</sup> Finengda keko, Kunum Fian e ben kel ding ka, nanew atin atin amen ding keleweko, ding be tokotoko ayem ding mak kelewsekale. Kelewse kasike, ben ding akalem ding mak amen dukusekale. Nimtew angom? Gung kel em ding be, e mesesem be kilel kolewsekale. Ki bakalik te, ben ding ka awet aulbamin e, finengdakamin ding kuw kelewsekale.

<sup>4</sup> Ka kel ete, Kunum Fian Yawe ete kawin so abiil so talfut dukuse sang ete te.

#### **B. Kunum Fian em Kunum Waneng Kilkeyemse Sang te.**

<sup>5</sup> Kate, soae kame melo dim ding bete, itel so, ais mesesem mesesem so, tebelinba belei, ding be suuk akal banim, kawin musun kailomin kunum mak banim keko, kawin be tiow kang angeko belei, <sup>6</sup>ok o yukam misin atew kawin katiw somelei, iti kawin ok so dukalewalekale. <sup>7</sup> Keko eli, Yawe Kunum Fian e tawal dak fakalat kelewko, kawin be amiyemi kelewsomelei, kunum mak keleweko, em mutum tem kel akalem fukfuka fu kelei, kunum be finik so kese-

kale. Kunum be Adam<sup>a</sup> te. <sup>8</sup>Kele eli, kunum be kulusomelei, ataan tele dulum kalote ken abiw mak dukulewei, e ka kel teinsekale. Abiw ka em wiin e Iden te. <sup>9</sup>Keko, ka kel ais banban talfut kelewsekale. Kelewsomelei, ais ati so ati so em dim e wanin dem so dem so kuw dukusekale. Ais dukusomelei, ais alew mak musun ka kel em mutuk kabalak dukusekale. Ais alew bi mak e finik so ais te, mak e wa so ken so em fitew dalomin ais te.

<sup>10</sup>Beli, musun Iden ka, ok malmil miktem telebin ok mak musun tem ka alenalekale. Ok bang be musum em kawin elo ok duleko, bin kesekale. Ok ka matem teleko eli, ok wokal wokal keko, alew alew aneng kalo kesekale. <sup>11</sup>Emisik ok em wiin e Bison te. E Kawila aneng kalote kesekale. Be em kawin dulum be sokyan ol kisol so eisneng angbiliwkale. <sup>12</sup>Sokyan ol be, ken ati kuw. Eisneng makso alew bete: Mak e filik falak tum win e, mak e kame ais gom mak te. <sup>13</sup>Beli, mak emteben ok em wiin e Gikon. Gikon ok bang e Kus aneng elo falal kolewsekale. <sup>14</sup>Yemamas ok be em wiin e Taigilis. Ok be ataan tele be dulum Asilia aneng dulum kalo kesekale. Ok fefe be em wiin e Yufeletis.

<sup>15</sup>Keko eli, Yawe Kunum Fian e kunum be musun Iden elo kilelbi ateblew dukuko, kolewsomelei, <sup>16</sup>e bokolewomele: “Ais angom mesesem be, ais dem be ken kuw wanbokolew te. <sup>17</sup>Kate, ku ais ken em so wa em so kal kemin be ais be wanewtewe, ku fongate kuw atin kuw kuanokolew tako.”, dangsekale.

<sup>18</sup>Dange eli, fein anfel mak Yawe Kunum Fian e bokolomele: “Adam emikel kuw belei, ken ba kasike, ne elo mak akalem atew mak em dokolew kemin mak kelo yo.”, angsekale. <sup>19</sup>Angesomelei, Yawe Kunum Fian e tawal kuluko, mesesem samal so abiil awon so angeko, kuluko, kunum be em mit koyemsekale. Koyemei, Kunum be ilo yetebomelei, ikalem wiin amen amen kuw bokoyemsekale. <sup>20</sup>Beli, kunum be mesesem kut samal bi so, am samal bi so, abiil em awon bi so, alik alik im wiin mak amen amen kuw bokoyemsekale.

Bokoyemse kate, mak akalem atew mak em dokolew kemin mak be banim kesekale.

<sup>21</sup> Beli, Yawe Kunum Fian e Adam e kiin ok ilum ilum mak kuanin atew dulewsomele eli, melen kun makmak takas kuluko, tem be iti talewsekale. <sup>22</sup> Taleweko, melen kun be kuluko, elo amemi keleko, waneng mak dukuko, ulo kunum be so kounmsekale. <sup>23</sup> Koumeko, kunum be waneng bu watemeko, bokolomele: “Kae, Yawe nakalem kun, nakalem dim kuluko, waneng bute dukunemse kasike, um wiin e waneng<sup>a</sup> te.”, wangsekale. <sup>24</sup> Beli kasike, kame, kunum mak alew so auk so koyem uneko, em kalel so teineko, i kal makmak bonggu kelokoliw te.

<sup>25</sup> Kunum be so, waneng bu so, yemkal bi ilim banim kesiliw kate, i finganinba kesiliwkale.

**3** <sup>1</sup> Beli, Yawe Kunum Fian e samal mesesem mesesem dukuse kate, sokyan em weng e kawtiw kak keyemsomelei, funum funum keyemin kunum e, kitil so em weng be, nam kalak dak koliw te. Kame, sokyan be waneng ulo bokoumomele: “Kunum Fian e ais dem kale wanboliw tako, yangse ya, fein e?” wangsekale. <sup>2</sup> Wang eli, usik kalote yan weng mak bokolewomelu: “Kunum Fian esik e ‘Ais dem mali kale ken kuw wanbokoliw te.’, nulo yangse eli, <sup>3</sup> kate e bokoyemomele: ‘Mutuk mak kale kasik wanbokoliw te. Wanbom, meni melelew kebom kemiwtewe, kuankemin matem dalokoliw te.’, yangaka be ete.”, dangsukale. <sup>4</sup> Dangu eli, sokyan esik yan weng bokoumomele: “Babo! Waniwtewe, nam kuaniw. Be wanboliw angom, funum bokoyemse. <sup>5</sup> Kunum Fian e kal kebe: Ding mak yu waniwtewe, yom kiin a dem a be ye, kal kunum waneng kesomeliw eli, Kunum Fian be em kal atew kelokoliw te. Wa kukuw so ken kukuw so kal kelokoliw te. Kesomeliwi, famdes Kunum Fian akalem kal atew keloliw angomi, e ayem atew keyembe te.”, sokyan e wangsekale.

<sup>6</sup> Wang eli, waneng bu ais dem be atemute, ais dem yom be atite atite weit weit kelei, um ibolow tem e wana wana ibolow kuw keum-

sekale. Nimtew angom? U fukun ute: “Ne kal waneng kelokobi kai!”, angomelu eli, fein e, dakuluko, wansomelu eli, mak e dakulu alueko, uneko, imok elo delew unsukale. Delew unu eli, imok emikal fein wansekale. <sup>7</sup> Yemkal i waniw eli, fein im kiin abil biliw e emdiw bamtak angeko, atem kal kesomeliw eli: Ikalem kal fitew kuw alenaliwkale. Bomiwi, kunum waneng alew bi inkal fian kulusomeliwi, ais kon fian kuluko, benesomeliwi, kasisiliwkale.

<sup>8</sup> Beli, aneng kuineko, dim gilil so kebe dim kelei, alew kililiw ete: Yawe Kunum Fian e guingui talakai, angomeliweli, i inkal fian kuluko, ais tem be bakalem musun dim wokmosiliwkale. <sup>9</sup> Wokmosiliw eli, Yawe Kunum Fian e kunum belo gaalewomele: “Ku nal kel kuw belew a?”, dangsekale. <sup>10</sup> Dange eli, kunum esik yan weng Yawe elo bokolewomele: “Ne kilili te, ku tele angomi, ne inkal kelome eli, nimtew angom? Kal fitew kuw bi kasike, inkal kelika.”, dangsekale. <sup>11</sup> Dange eli, Yawe esik kunum dakalalomele: “Ku nono keko, kal kelomelew ku kal fitew kuw belew? Ku kate, ais dem ayem o kangsi ete, ku wanekembelew kae?”, dangsekale. <sup>12</sup> Dange eli, kunum be yan weng bokolewomele: “Nete bate! Waneng kalute ais dem be nelu dunemui, ne wani te.”, dangsekale. <sup>13</sup> Dange eli, Kunum Fian esik waneng ulo dakalalomele: “Ku nimtew angomete a?”, wangsekale. Wange eli, usik yan weng bokolewomelu: “Nete bate! Sokyan ete kak kenembe eli, ais dem kale dakalu wanika.”, dangsukale. <sup>14</sup> Dangu eli, Yawe Kunum Fian e weng yakok so mak sokyan elo dulewsomelei: “Ne ilum fian mak kulo dukemika. Beli, kom ilum fian dukemi kale. Am samal so, kut samal so, nam sakok keko, iso nam bew te. Ne kulo kuluko, komikel amen mak kale elo kekemi te. Diwkuw, teing banim yan banim kom kumun kom betekuw kawin dim gilin-gili kakabomelewi, kawin kukun kutew kutew betekuw wanen kakamokelew te. <sup>15</sup> Waneng busik maka kekemui, kusik maka keumew kem kakamokoliw te. Beli, waneng bu um angin so, kom angin so, maka kelew kelew kem kakamokoliw te. Deiw mak ding e, mak e kom kak kawtol kekemoke te. Kusik yan ete tei wane em bokolew te.”, Kunum Fian ete sokyan elo dangsekale. <sup>16</sup> Dange eli, e waneng bu bokoumomele: “Diwkuw diwkuw, ku aul kumuneko, aul

mewso dukulomin kemew dim eli, ilum fian kulusomelewi, betbet fian akal mak kulamokolew te. Kulamokolew kate, diwkuw diwkuw, iti kimok elo ibolow kelokolew kate, kimok em weng ete kuw wasu kebomelewi, em afak kuw bolewka.”, wangsekale. <sup>17</sup> Wange eli, Kunum Fian e Adam elo weng mak bokolewomele: “Ku kalel um weng wasulomelewi, ais dem ayam be wanew kasike, kawin dim kale nam ken kuw nam kakamew te. Wanin soul kawin dim bokolew be, aluw ke bi, ilum kakon bi, douw falil bi, somelew ete, wan bokolew te. <sup>18</sup> Wanin musun be wan bokolew kate, musun kakamokolew dim be, itel akati ningning itel kuw kelokobe te. <sup>19</sup> Ku dauw falil falil kuw kesomi, alubamokolew te. Beli, deiw mak ding mak kuanokolew tako. Kuan kemin dim kesomelei, iti tawal kelokolew te. Nimtew angom? Ne tawal akate kulusomelii, kunum kulo amiyemi kekemsi kasike, kukal kuaneko, uneko, iti kawin tawal akate kebom, bokolew te.”, dangsekale.

<sup>20</sup> Dangei, Adam e em kalel um wiin e bokoumomele: “Kom wiin e Iw!”, wangsekale. Nimtew angom? Kunum waneng bi im awkok dukusu waneng ute te. <sup>21</sup> Beli, Yawe Kunum Fian e samal kal mak kulusome eli, beneko, Adam so em kalel so yemkal ilo minggiyemsekale.

<sup>22</sup> Minggu kasiyemeko, Yawe Kunum Fian e bokolomele: “Kame, kunum waneng wa so ken so eisenng be kal kelin angom kasike, nukalem atew keloliw. Keliwi, i ais dem kale mewso be em dulum akal unemokoliw te. Iti uneko, waniwtewe, ikalem finik e nam kuaniw te. Diwkuw diwkuw bokoliw te.”, angsekale. <sup>23</sup> Angesomelei, Yawe Kunum Fian e kunum so waneng so bi musun Iden ka kel em bine yembakalasekale. Soae, e kawin tawal akate kuluko, kunum amiyemi kelewsete, kame kunum be uneko, bakalem kawin dim akate musun wanin kaibom, alenaliwkale.

<sup>24</sup> Beli, Yawe Kunum Fian e Adam so em kalel so yemkal Iden bine kuluko, koyemeko, ataan telebe dulum musun be em dulum kalote kel, akalem aluwbamin yemdakamin kunum kitil nam mak mo

---

koyemsekale. Kunum Fian em yemdakamin aluwbamin kunum bi im wiin e Kelubim te. I biol atul o, tiakim o, alibin fian atew famdes famdes kelewse so tuk mosiliwkale. Tuk moko, Iden musun ka kel kuw diwkuw diwkuw atebin kebiw kasike, kawtiw bi ais ayem finik duyembe be em mit mewso nam uniw te.